

Dumonda Tomaschett concernent tempo 50 sin il sviament da Laax

La via chantunala a Laax vegn schlargiada. Il traffic daventa a medem temp pli plaun. La via sursilvana vegn curregida per 14 milliuns francs ed – en il rom da la sanaziun cunter la canera – vegn la sveltezza maximala reducida sin in traject da passa dus kilometers da tempo 80 respectivamain da tempo 60 a tempo 50. La mesira numnada n'è betg chapibla per bieras pendularias e biers pendularis che charreschan mintga di da la part sura e da la part centrala da la Surselva en la chapitala. La reducziun pretenda dapli temp dad ellas ed els. Il temp supplementar ch'ellas ed els ston passentar en il traffic sin via, las ed als manca pia per la famiglia e per las activitads da temp liber.

Tenor la Lescha davart il traffic sin via (LTV; CS 741.01) sto la sveltezza adina vegnir adattada a las circumstanzas, cunzunt a las particularitads dal vehichel e da la chargia, sco er a las relaziuns da la via, dal traffic e da la vista. Sin fundament da questa argumentaziun n'è l'ordinaziun d'ina reducziun da la sveltezza en il sector dal sviament da Laax e da la via principala cunfinanta betg proporziunala e logica.

Plinavant stoi vegnir constatà, che la valur da las immobiglias per lung da la via principala è s'augmentada sin donn e cust dal traffic individual.

Las sutsegnadras ed ils sutsegnaders supplitgeschan la Regenza da responder las suandantas dumondas:

1. Tgi ha – sin fundament da tge basa legala e tenor tge criteris – disponì la sanaziun cunter canera da las vias chantunalas a Laax?
2. Tgi ha concludì questa reducziun da sveltezza a Laax, e quai tenor quals criteris?
3. Sin quants kilometers da las vias chantunalas è – fin ils 31-12-2023 – vegnida fatga ina sanaziun cunter canera cun ina reducziun da la sveltezza. Quants kilometers da las vias chantunalas duain subir ina reducziun da la sveltezza ils proxims onns?
4. Quant auta stima la Regenza che la plivalur da las immobiglias en il sector dal sviament e da la via principala vegnia ad esser suenter la sanaziun cunter canera ed è prevista ina taxa sin la plivalur a favur dal chantun?

Cuira, ils 30 d'avust 2024

Tomaschett, Sgier, Bundi, Beeli, Berther, Berthod, Cahenzli (Sagogn), Caluori, Candrian, Casutt, Claus, Collenberg, Cortesi, Cramer, Della Cà, Derungs, Dürler, Furger, Lamprecht, Lehner, Luzio, Menghini-Inauen, Messmer-Blumer, Mittner, Quinter, Righetti, Said Bucher, Schutz, Spagnolatti, von Wyl